

Komunikadu Imprensa
18 Novembru 2024

**Autór judisiáriu iha Juridisaun Tribunál Suai rekere lejislasaun komplementár
atu aplika pena traballu afavor ba comunidade**

Autór judisiáriu iha Juridisaun Tribunál Suai rekere lejislasaun komplementár atu aplika pena traballu afavor ba comunidade. Ezijensia ne'e hato'o durante diskusaun ho autór judisiáriu sira ho tema **“Konsolidasaun Esforsu atu Prevene Violénsia Bazeia ba Jéneru liuhosi desizaun judisiál”**, ne'ebé realiza iha 14 Novembru 2024, iha Hotel Vida Nova, Suai. Diskusaun envolve Juis, Prokuradór, advogadu privadu no parseiru sira hanesan ALFeLa, Pradet, Fokupers no Uma-Mahon Salele.

Antes ne'e, JSMP realiza ona diskusaun ba materia ka asuntu ne'e ho autór judisiáriu sira iha RAEOA. Atividade ne'e ho objetivu atu apresenta rezultadu monitorizasaun JSMP iha tribunál judisiál sira kona-ba tendénsia kazu sira iha tribunál no tendénsia desizaun tribunál sira ne'ebé la prodús efeitu susesiva ka efeitu hata'uk atu refleto ba objetivu pena ka sentensa ne'ebé hatuur iha Kódigu Penál.

Diskusaun ne'e atu apresenta mós survei nivel satisfasaun públiku relasiona ho funksionamentu setór justisa nian no esforsu sira kona-ba polítika kriminal ba alterasaun Kódigu Penál (KP) no Lei Kontra Violénsia Doméstika (LKVD) atu inkorpora kazu inestu nu'udar krime ho artigu espesifiku iha KP no krime relevante seluk iha LKVD.

“JSMP kontinua promove dialogu no diskusaun konstrutivu ho autór judisiáriu atu apresenta dadus estatistika sira ne'ebé JSMP rekolla hosi atividade monitorizasaun no analiza ba tendensia hirak ne'e atu diskuti direta no explora alternativa dentru lei penál ninia ambitu atu hametin liután desizaun tribunál ba kazu violénsia doméstika sira”, dehan Sr. Casimiro dos Santos, Diretór Ezekutivu interinu JSMP.

Iha diskusaun ne'e, JSMP apresenta dadus estatistika kazu ne'ebé JSMP rekolla no pena ka sentensa ne'ebé tribunál sira normalmente aplika ba kazu violénsia doméstika sira no perspetiva JSMP kona-ba pena hirak ne'e. Bazeia ba JSMP ninia dadus estatistika sira mezmu tribunál konsistentemente aplika suspensaun ba pena prizaun nia ezekusaun iha maioria kazu sira violénsia doméstika, maibé pena ne'e la iha kbiit atu prodús “efeitu-hata'uk” no prevensaun jerál iha sosiedade nu'udar finalidade hosi pena ne'ebé Kódigu Penál estabelese.

Juis Administradór Tribunál Judisiál Primeira Instánsia Suai, Dr. Nasson M. A. M. Doutel, hateten katak diskusaun ho tema ne'ebé mak ohin JSMP apresenta ona bele mellora di'ak liután atendumtu ba feto no labarik sira no ho diskusaun ne'e atu fó hanoin ba malu saida mak sai hanesan ita hotu ninia preokupasaun durante ne'e.

Relasiona ho pena traballu afavor ba comunidade, juis sira entende katak iha duni provizaun lubuk ida iha Kódigu Penál ne'ebé ko'alia kona-ba pena refere, maibé

durante ne'e juis sira la aplika pena refere, tanba laiha mekanizmu kontrola, laiha regra espesifiku, laiha kondisaun no presiza mós diploma atu orienta prosesu hirak ne'e.

Entretantu kona-ba survei nível satisfasaun públiku relasiona ho adiamentu prosesu juis sira hatan katak dala ruma tribunál kumpri hotu ona notifikasaun ba parte sira iha Maliana, Same no Ainaro, maibé difikuldade mak fatin balu laiha transporte públiku, nune'e difikulta parte sira atu marka prezensa iha tribunál. Tanba ne'e, sira ezije estabese ona tribunál iha distritu sira tuir ona Lei Organizaun Judisiáriu atu nune'e la difikulta parte sira bainhira atu asesu ba justisa formál.

Relasiona ho esforsu sira relasiona ho polítika kriminal ba alterasaun Kódigu Penál, juis sira konkorda atu bele iha provizaun espesifiku ba kazu inestu, maibé presiza asegura atu lakuna sira ne'ebé sai dezafiu ba protesaun ba vítima sira bele inkorpora hotu. Alende ne'e relasiona ho artigu 35 LKVD mós presiza reeve atu inklui tán artigu seluk ne'ebé seidauk konsidera hanesan krime públiku.

Diskusaun ne'e realiza ho forma ida informál hanesan diskusaun ne'ebé antes ne'e realiza ona iha juridisaun Oekusi no iha ambiente ida amigável no permite interasaun ativu entre autór judisiáriu no partisipante sira.

Atividade ne'e realiza ho apoiu hosi TAF – Nabilan.

Atu hetan informasaun kompletu favor kontaktu:

Casimiro dos Santos
Diretór Ezekutivu Interinu JSMP
Diresaun e-mail: casimiro@jsmp.tl
Telefone: (+670) 33238883 | 77257466
Website: <https://jsmp.tl>
info@jsmp.tl